

JÈKABAARA




"ni jèkafò ye daamu ye,
jèkabaara nyogon daamu tè."

OCED



nimòrò 23 – san 1987n nowanburu kaiò – a sòngò : dòròmè 20



Kaaba filè Makan, Sawudi jamana la

Min bè sòrò nimòrò in kònò : o filè min ye :

- | | |
|-------------|--|
| nyè 2,3,4,5 | Din w kibaruya : Sawudi jamana |
| nyè 6, 7, 8 | Cike dönniya : suman sannifeere |
| nyè 9 | Tiga sènè baarada kunnafoni : an bèna dugu kura sigi
tanuli sèbèn |
| nyè 10,11 | Farikolo nyènajè : ntola ci san tèmènen lahalaya |
| nyè 12 | Tulon tè sèbè sa : furu ye jigi ye
jèlan ka fisa nègehaya ye |

dinye kibaruya

Sawudi jamana

Sawudi jamana bugun letigè sèbèn

Sigi yòrò : Azi tilebin bolo kan

kènè : Bam² 2 149 690

kòron ni tilebin : bam. 1500
kènyèka ni worodugu : bam 2000
cikè dugukolo : kènè 15 %
dugukolo cikèlen : 0,5 %

Jama : 8 600 000. A tlannen bè nin cogo la :

- 38 % bè dugubaw kònò
- 33% ye cikèla basigilenw ye
- 20 % bè dugu misènw kònò
- 9 % ye daga yòrò yèlèmanaw ye

Dugubaw : Riyadi : mògò 700 000

Jèda : mògò 600 000

Makan : mògò 400 000

Sèrè : Taji jòyòrò ye 70 % ye jamana sòrò la, o ye 99 % ye jamana ka feere fènw na.


A tòni miliyari 20 ni miliyòn 500 nyògòn bè dugukolo jukòrò ; tòni miliyòn 510 bè sama san kònò. O bè bèn 13,2 % mè dinyè taji bòlen bè lajèlen na.

Sawudi jamana ye Makan jamana deye. Jamana belebele don Afiriki ni Asi cè, a tilebin fè bolo dalen bè Misira jamana ni Sudan jamana kan, kògòji blen dankan na.


Ni Makan taala sera jamana in kun na pankurun na, i b'a fuga lankolonba dalen ye, i ko Mali saheli kungo. Nka larabuw ye kungo kolon in kélè ka dakabana duguw jò a kònò. Kabi dugu ninnu masurunna, i bè jin belebelew ye ani bòlonbaw n'u yeelenba caman.

Sawudi jamana in bè kògòji fila da la : kogòji blen ni Gòlfu pèrsiki, minnu bè sèbè taama kurunw fè, bawo dinyè taji tlàn yòrò 30 % bè tèmè yen.

O sigi yòrò in fisayara a ma kosèbè k'a d'a kan a kèra sababu ye ka jamana sòrò yiriwa teliya la. Nòntè, a sòrò tun dannen bè baganmara ni mònni ni cikè cogo kòròw de ma.



jin belebelew ani bòlonbaw n'u yeelenba caman




laada kòròw ni sira kuraw

Laada kòròw ni sira kuraw kelen bë ka nyògòn sòrò Makan jamana na :

- Ale de ye dinyè taji feerelaw la belebele ye ; a dugu kòrò taji ka ca ni bëe ta ye ; a bòli yamaruya fòlò dira 1933 san na, masa fanga in sigibaga fè, n'o ye Abdel Aziz Ibn Abdèramani El Sawudi ye, ni bëe ko a ma Ibn Sawudi.
- Ale jamana kelen in dë fana ye silamèya buruju n'a sinsin-baga ye. O' taamashyèn ye Makan ni Madina makaama bonya ye dinyè silamè miliyòn 800 bëe bolo.

Sòrò sira fila ninnu tè nyògòn sa : julaya ni kuranè. U sera ka siraw bò kuranè kònò u ka maaya ni mara ni sariyaw bë tèmè sira minnu fè, n'u bë bèn bi sòrò yiriwa siraw fana ma.



mògò 5.000 bë don misiri in kònò pankurun jigin yòrò la


O y'a to fanga bë da u kan dinyè kònò diinè sira fè, wa u gasi bë sigi fana k'a d'a kan se b'u ye taji ni nafolo sababu la.

Riyadi

Sawudi jamana faaba ye

Riyadi ye. Faraso kuraw ni misiri janbaw nyagaminen bë ye.

A pankurun jigin yòrò kura tògò dalen bë Kalèdi la, u ka masakè min sara 1982 la. A dakabana dilannen bë, a panni siraba bëe janya ye mètèrè



cikè ma to kò : foro sòn mansin belebele filè nin ye

4.200 ye. A pankurunso bè se ka taa-mana miliyòn 15 jigin san kònò. A filèli jin nyögòn tè janya la (mètèrè 81), mögò 5.000 bè don a misiri kònò.

Riyadi ye duguba cènyi saniyalen ye jiri nugulenw cè la. A sigi yòrò bènna jima yòrò n'a sènèkè yòrò nyuman ma. Dunanw bè bò fan bée ka na baara kè yen, bawo jamanadenw ka dògò a kènè bonya ma.

Jòli bè sen na hali bi Riyadi ni duguba tòw kònò : kin kura, sirabaw, sisow, kalansow, farikolo nyènajè yòròw... Jòliba fanba ye Ameriki ni Eròpu cikèdaw ye.

A yòrò jòlen kuraw bée la, seli yòrò bè labèn ani lafiya yòròw ani jama kafo yòròw ni dunan ladon yòròw, ka bèn fuga lankolon jamana maaw ka dinyè-latigè cogo ma.

cikè ni baganmara

Cikè fana ma to kò : sènèkèda kuraw sigira, balanw ni jibondonw jòra, kòlònw senna ka ji boli siraw dlan. Dabalidaw jòra, minnu bè kògò bò ji la k'a kè foro sòn ji ye.

San duuru dòròn, jamana sera a yèrè kòrò alikaama sènè na. Kabi 1979 san na, a yèrè ka shè maralen ni shè fan b'a mago nyè.


Riyadi dafèla la, bin fugaw labènna yaasa ka Nòrmandi (n'o ye Faransi jamana yòrò dò ye) ni Olandi misi sannenw balo u nònò nò fè.



bagan Mara yòrò Riyadi dafèla la

Mali ni Sawudi jamana ka jè ka sinsin bere ye silamèya ye kabi san kèmè caman. San o san, Mali mögòw bè taa hiji la Makan. Sannifeere caman bè tèmè u ni nyögòn cè.

Makan jamana bè Afiriki tilébin la silamè jamanaw dèmè, bawo se b'a ye k'a sababu kè taji ye. Mali ye nafaba sòrò o dèmè na : kòlòn 400 ni kò senna Segu ni Kulukòrò mara la.



nin nyögòn kòlòn 400 senna Segu ni Kulukòrò mara la

ciké donniya

suman sannifeere

An bëe y'a dòn ko suman sannifeere ko ka gèlèn cikèlaw bolo kabini lawale fo ka n'a bila sisani na : ni suman sòròla ka caya san min, a songò bë bin, cikèla tè tònò sòrò o la ; ni suman ma caya san min, a songò bë yèlèn, nka cikèla tè tònò sòrò o la, bawo o b'a sòrò suman bë dësè a yèrè bolo.

Jagomanfilakèlaw fana bë dò fara suman sannifeere gèlèya in kan : ni suman cayara k'a songò bin, u bë girin a kan. N'o dògòyara tuma min, u b'a kòfeere da gèlènman na, walima u b'a juru don k'a kè yuruguyurugu ye.

O yuruguyurugu ninnu kèle kanma, Mali gòfèrènaman ye OPAM sigi, n'o ye faso jiginèba ye. Waati dò tèmèna, OPAM kelen de tun yamaryalen bë ka suman san, yaasa cikèlaw ka tònò sòrò, suman fana kana dësè duguba mögòw bolo.

Nka o fana ma bèn. An bë hakili b'a la ko cikèlaw tòoròla waati dòw la, k'a d'a kan, u tun wajibiyalen don ka suman feere k'a sòrò suman

tun bë dësè u yèrè bolo, fo dòw yèrè tun ka kan ka suman san da gèlènman na k'u ka du labalo.

Kosa in na, fèerè fila tigèra ka gèlèya ninnu kùnbèn :

- A fòlò ye wale dò ye, min bë wele ko "suman jago ròkuraya wale" (n'a bë wele tubabukan na ko : PRMC). O wale kèra sababu ye ka suman sannifeere ko labila cikèlaw ye, k'a to u yèrè sago la. Yèlèma donna OPAM fana jòyòrò la, k'a nyèsin suman ko nògòyali ma : ni suman cayara tuma min, OPAM bë caman san yaasa a songò kana bin ; o suman bë mara k'a kòfeere suman dògòya tuma, yaasa a songò kana yèlèn ka danma tèmè.

- Nka a yera nyinan ko OPAM tèna se k'a jòyòrò fa tuma bëe. O la, fèerè filanan tigèra, ni Jèkabaara delila k'a kofò a nimòrò 13 n'a nimòrò 17 ni 19 kònò : o ye jiginè ñana jòli ye duguw kònò, walasa dugu yiriwa tòn ka suman san da duman na, k'a mara sani a ka songò sòrò, k'a kòfeere ka tònò sòrò o la.

O feere fila de bë kofò Jèkabaara in kònò.

suman jago ròkuraya wale

Wale in sun bò yòrò

1978 san, dinyè balo ni sènè tòn (n'o bë wele tubabukan na ko FAO) ye sèbèn dò dilan Mali suman ko kan ; kuntilenna dò fana bòra jèkafo dò la, min kèra OPAM ni suman sannifeere ko ròkurayali kan. Suman jago ròkuraya wale in sun bòra o yòrò fila de la.

1980 san kalo 12n tile 9, bolomadèmè kulu dò ye sèbèn ci musaka ni jago setigida la,

OPAM kalifalen bë o min ma, k'u b'a fè ka dèmè don suman jago ròkurayali ma : u k'u bë suman kisè tòn 250 nyini Mali la san duuru kònò (o fanba bë kè kaba ye), o ka feere OPAM fè jamana sumanw feere da la.

Wari min bë sòrò o la, Mali ni bolomadèmè kulu bë jè k'o kè suman jago labènni musaka ye,

1981 san kalo 2n tile 18, Mali setigi kulu dinyèna ni hakilila in ye, k'a waleyali

kalifa nafolo ko ni jago ko setigi ma.

Bolomadèmè kulu y'a ka baara dònnaw sigi 1981 san kalo 6n.

Baara min kèra

Suman jago ròkuraya wale dakun fòlò ye san duuru kè : k'ata 1981 fo 1985 san.

A b'a nònkon yèlèma yòrò la sisani, waati fila dancè, ja

waati ni suman ko nògòya waa-ti. O la, OPAM jòyòrò dògò-yara sannifeere basigili la.

Suman jago ròkuraya wale in kèra sababu ye

- ka sefa miliyari 12 lalon, o ka kè suman jago sabatili musaka ye,
- ka sanyò ni keninge ni kaba sannifeere labila fòlò, ka sòrò ka se malo kaama ni malo kisè ma,

- ka dè bò OPAM kan na juru la - ka sini nyèsigi suman lasagon OPAM fè,

- ka suman ko kunko dòw to jagokèla ni cikèlaw yèrè bolo.

Nyò ni kaba jago labilali ye sannifeere nògòya, ka suman dèse kumbèn dugubaw kònò 1984 ni 1985 waati la.

Bi, jamana dahirimè jate bè minè san o san :

- hakè min bè sòrò jamana yèrè sènèfèn na,

- hakè min ka kan ka san kò fè ka na,
- hakè min ka kan ka nyini dèmè siratègè la.

Hali bi, wale in bè se ka nyè ka taa a fè

Suman jago ròkuraya wale in nò yera ka ban, nka a bè se ka nyè ka taa a fè.

Suman bè san da min na cikèlaw bolo, ani OPAM b'a feere da min na, nio labilala ka to u sago la dòonin, o bè kè sababu ye sòngò ni sòrò ka nyògòn ta, bawo san bée n'a sòrò cogoya don.

An ka sènè malo ka kan ka jakana, kò kan malo kana a da bin.

K'a da o kan, Mali y'a nyini bolomadémè kulu fè, a ka san saba fara suman jago ròkuraya

bolomadémè kulu

Kulu minnu fòlò tun b'a la :

- dinyè waribon,
- Kanada,
- Eròpu sòrò jèkulu,
- Balo ni sènè tòn (FAO),
- Faransi,
- dinyè balo ko fèerè nyinida,
- tilebin aliman jamana,
- Ameriki kafo jamana.

Kulu wèrè sinna ka fara nin fòlò ninnu kan :

- Bèlziki,
- Olandi,
- Angle jamanaba.

wale kuntaa kan. Nyògònye bè na kè o la kòsa fè.

O bè kè sababu ye ka cikèlaw ka sòrò sabati. Jamana fana bè senyérèkòrò min nyini balo ko la, a b'o tiimè siraw sinsin.

duguw kònò jiginè ñanaw

Min kèra salon

Suman tun cayara an ka mara kònò salon nowanburu kalo waati la, fo k'a kè sababu ye ka sumanw da bin kungo kònò dògòw la. Faso jiginèba (OPAM) min tun ka kan ka sanni kè walasa ka sòngòw kòròta, o ma se k'o baara kè o tuma na.

Walasa ka tinyèni kumbèn, nyèmògòw y'a nyini sumanw ka lasagon duguw kònò jiginè ñanaw kònò. Cikèla ka wariso (n'o tògò ko BNDA) ye déme labèn o kamma.

Yaasa o baara ka se ka sira sòrò, baarada min bè Mali kònò, n'o ye "suman jago ròkura-ya wale" ye, o ni Kanada jama-

na jèra ka miliyòn 500 labila BNDA ye. O kèra sababu ye, BNDA sera ka tòni 9.000 wari juru don dugu yiriwa tònw na.

OPAM ye sanni kè mè kalo sa tuma ; dugu yiriwa tòn ye suman maralen bée bò k'a feere, o de y'a to BNDA ka juru bée sarala a sara tuma na.

Tòn fana sòròla dugu caman fè, i n'a fò Dèncola ta fôra cogo min Jèkabaara nímòrò 19 kònò.

O baara in kèra ko kura ye dugu bolo, bawo u tun ma dege suman baara la nin cogo fôlen in na, fo n'a kèra Bòbò dugu dòw ye, minnu tun y'a daminè kabini san 1984 la.

Nyinan ta ka kan ka kè ka nyè cogo min

An bè bi bi min na, kiimèli ka kan ka kè, k'a kòlòsi, ko ninnu kèra cogo min, u ye tònò min lase dugu mògòw ma, ani nyinan ta bè se ka kè ka nyè cogo min na.

juru don tuma

Nin san fòlò la, a tè se k'a fò ko baara in nafa bée bòra. Bawo BNDA ka juruw ma kòn ka se dugu yiriwa tònw na : wari nana feburuye ni marisi kalo la, o waati dun y'a sòrò cikèlaw ye sannifeere wari sòrò ka ban, k'u magow nyènabò.

Ni dugu yiriwa tòn min b'a fè

**Dugú kònò jiginè ñanaaw bè cogo min na CMDT maraw kònò
(okutòbúru kalo tilie 15 san 1987)**

	San	Kucala	Sikaso	Buguni	Fana	mumè
Dugu minnu ye jiginè ñana jò jiginè ñana hakè	11 7	81 126	41 44	21 38	72 161	226 376
BNDA ye juru min don (dòròmè)	1 032 400	10 624 460	3 022 150	2 138 175	7 447 400	24 264 585
nyò sannen (kilo)	92 255	1 218 288	158 000	47 969	603 716	2 120 228
kaba sannen (kilo)		297 515	182 500	141 320	118 840	740 175
malo sannen (kilo)			25 000			25 000
sannen mumè	92 255	1 515 803	365 500	189 289	722 556	2 885 403
OPAM ye min san (kilo)	62 487	1 470 600	292 100	125 733	393 884	2 364 804
feereelen tòw (kilo)	29 768		73 500	53 602	167 068	313 938
feereelen mumè	92 255	1 470 600	365 600	199 335	550 952	2 678 742
BNDA ka juru saralen (dòròmè)	439 400	7 229 826	1 083 877	926 900	762 732	10 442 735

ka tònòba sòrò, o ka kan ka wuli sanni fè kabini nyò tigè tuma. O waati la, sènèkèlaw bè nyò dòonin feere k'a kè suman ladon musakaw ye, i n'a fò kòori bò. Bèe b'a dòn, suman tigè tuma, sòngò bèe bè nyò la : dòròmè 4 ni dòròmè 6 kilo kelen. Dugu yiriwa tòn bè se ka dèsebagatòw dèmè n'u ka sènèfènw sanni ye dòròmè 5 wali dòròmè 7, n'a bè sòrò dògò la dòròmè 4 wali dòròmè 6.

O waati la fana, kòlòsili ka kan ka kè suma ja cogo la, i n'a fò kaba min ka teli ka mögò bin, bawo dò bè bò a girinya la n'a bè ja.

nyò feere tuma

Ni suman ladon banna, sòngò bè yèlèn. San mana diya cogo o cogo, nyò kilo sòngò tè dèse dòròmè 8 wali dòròmè 10 ma zuwèn ni zuluye kalo la. Ni nin baara kèra a kè cogo la, a bè se ka wari lase dugu ma fo ka kè tuma dòw la dòròmè 5 ye kilo kelen kelen bée kan.

O tònò bè se ka bila dugu

kèsu kònò, walima ka tila ci-kèlaw ni nyògòn cè, minnu ka nyò feerela nowanburu kalo la.

Ni nin kè cogo in sangara kòori dògòlabaara sara ma, an b'a yé ko nyò baara in sòrò ka bon ni kòori ta ye fo sinyè 10 nyògòn kilo kelen kelen kan.

sannifeere bè labèn

Dugu ka nyò maralen tònò tè sòrò fo dugu mögò ka ladònniya kosèbè dògò duguw suman sòngò kan : n'u y'a ye ko sumanw sòngò yèlènna, dugu mögò bè wuli feereli fè.

Sumanw ka kan ka doni wotoro la ka taa dògò duguw la, sannifeere ka kan ka labèn, k'a bènkanw sòrò jagokè-law fè. Dugu mögò bè kòori sannifeere labèn cogo min, u ka kan ka suman feere in fana labèn o cogo la.

nyinan ta

Nyinan san 1987, CMDT ni BNDA bëna nyò san k'a mara

baara sigi sen kan dugu yiriwa tònò kònò.

O bëna a to baara in bè se dugu caman na, yaasa cikèla sòròntanw ka se ka nafa sòrò, dugu yiriwa tòn ka wari sòrò.

O bée lajèlen bè na ni dugubaw ka suman sòrò ka labò ye.



tiga sene baarada kunnafoni



An bëna dugu kura sigi

A tun bë fò ko kaarisa de ye nin dugu masina tu tigè, wa an ka dugu bë sigi, a bë fò ko kaarisa de ye nin dugu in jiri fòlò turu.

O ka kè sa ! N'o tè, tu caman tigèra, nka dugu caman fana kèra tomon ye. Wa jamana yèrè bée bée nyini ka kè tomon ye, a yèrè kèr'a ye ka ban.

N'o siga bë mògò min na, o ka wuli k'i yaala dòonin jamana kònò. I tè se yòrò si la n'a tè fò i ye ko : "Fòlò, nin yòrò in tun ye tuba ye, nka bi, hali nyin sògòbè kala tè yen". N'o ma fò i ye, a na fò ko : "Nin kò in tun tè ja samiyè ni tilema". O kèra bée nyè na, nka mògò si ma fèn fò, mògò si ma fèn kè.

O la, bi anw tè se ka tu tigè tugun ka dugu sigi, anw bë jiri turu fòlò ka sòrò ka dugu in sigi.

N'a sigira, an n'a tògò da **Nèemabugu**, an b'a fò Nèemabugu kè ! N ko jiri ye nèema de ye ! N ko jiri turu ye ala deli de ye !

An k'an ka jiri turu kè fo k'an tunun a tu kònò. Ala b'a ka nèema jigin an kan k'a sababu kè jiri ye. Jiri tè ko jugu kè, jiri ka sanu, jiri bë hinè.

An ka taa Nèemabugu jiri turu, ka Nèemabugu sigi. An ka dugu in tè kè tomon ye k'a d'a kan a tu tè tigè, a jiri de bë turu. N'an ye Nèemabugu sigi, so foro ni kungo foro bée bë lamini ni jiri ye.

Tile tè ye Nèemabugu dugu kònò, ga tè jò a sugu la, wa minnògò tè bagan faga, janko mògò.

Nèemabugu tobili kè ni gakulu gana tè. Nèemabugu

sariyaw ye wolonwula ye :

1. N'i ye jiri kelen tigè, i bë fila turu a nò na.
2. San o san, dögökun kelen bë bila jiri turu ni jiri ladon kanma.
3. Baara wèrè tè kè o dögökun kònò ni jiri turu ani jiri ladon tè.
4. Nèemabuguka mana kè yòrò o yòrò, a wajibiyalen bë a ma a ka laada sabanan in matarafa.
5. Nèemabuguka tè jiri tigè k'a kè dögò ye.
6. Nèemabuguka den bée bë jiri kelen turu a don san kalan na.
7. Nèemabuguka tènè ye tasuma don ye kungo kònò.

Nin bée mana kè dugu min ka laadaw ye, an bë se k'o wele **Nèemabugu**. Jiritigèbugukaw n'a wele "Jiriturubugu". Ni jiritigèbugukaw nana Nèemabugu

gu, u bë musow ye baro la ga da la, nka u t'a dòn ko tobili bë kan ka kè ; o b'a sòro dumuni mòlen don gakulu gana kan. A na kè Jiritigèbugukaw hakili la fana ko Nèemabugu nènè tè ban k'a d'a kan, sanga ni waati bée la, nèema bë an ka dugu in n'a lamini bée la.

Dòw mana an ka dugu in sigili ko mèn, u n'a fò an bë sugo la. O mana kè sugo min ye, ala k'o kè tinyè ye. Ni min dalen b'o la ko Nèemabugu bë se ka sigi, o ka na, an ka taa Nèemabugu sigi.

Ni Nèemabugu sigira, a na nyinsòn ni jugusòn kè, k'a d'a kan n'i ye jiri turu, nyin ni jugu bée bë sigi a suma kòrò, wa u bée b'a den dun.

Anw ka Nèemabugu bë sigi, wa a tè kè tomon ye fana !

- Bakari Suntura
Kita

Tanuli sèbèn

ODIPAC nyémògò min bë Kita mara kun na, ani Kita ODIPAC baarakèla bée bë jè ka nin tanuli sèbèn in ci Kòlen dugutigi, a dugu yiriwa tòn nyémògò ani Kòlenka bée ma, k'u tanu u ka baara nyuman kosòn.

Aw ni tanuli ka kan, k'a da aw ka mangasa baara konyuman ani dugu yiriwa tòn labèn konyuman kan. Tònò min sòròla aw ka mangasa kònò, o bë aw ka cèsiri ni aw ka tilennenya jira dugu yiriwa tòn ko la.

N ba nyini aw fè hali bi, aw ka dò fara cèsiri kan, walasa Kòlen ka kè Kita mara dugu yiriwa tòn ka kalamènè ye.

ODIPAC nyémògò bée ka foli bë aw ye.

Kita ODIPAC nyémògò
Yankari Kulubali

Jèkabarara kalanbaga caman y'a kanu farikolo nyenajè kibaruya ka fara kunnafoni ditaw kan : Mali farikolo nyenajè, Afiriki farikolo nyenajè, dinyè farikolo nyenajè kibaruya kumbabaw.

K'a ta balònw na (balòn tan, baskèti, balòn pan, balòn fili, balòn gosi...) ka taa a bila farijow la (boli, juru pan, dingè pan, pwa fili, nègèso boli, nònni, so boli...) ani kèlè fèerèw (syèn ta, bolo kurun, zido, karate...) ani tulon wèrèw i ko damu ni eshèki, Jèkabaara da na se nin bée ma.

Nka bée y'a dòn balòn tan (n'o ye ntola ci ye) de ye an ka jamana farikolo nyenajèw la masa ye. O kosòn, an b'a da tigè n'ale ye, ka masaya segin a tigi ma.

ntola ci san tèmènen lahalaya

1986-1987 san kupuw n'u tabagaw

Benki BMCD kupu Joliba ye Bitòn ci : 1 - 0

INPS (den sara ta yòrò) kupu Joliba ye Bitòn ci : 3 - 0

Mali kupu Sigi ye Reyal ci : 3 - 1

Kalwe kupu Estdad ye Joliba ci 1 - 0

ŋana minè ŋana kupu Estad ye Sigi ci : 4 - 0



Sigi balòn tannaw filè, ka bò Kayi. Sigi ye Reyal ci Mali kupu la.

1986 - 1987 san nana sugandi

Tònw	kuru hakè	bòli hakè	se hakè	filanin bin	binni hakè	bi donnén	bitalen
1. Estad	10	6	4	2	0	9	1
2. Reyal	6	6	1	4	1	2	5
3. Jolibá	5	6	2	1	3	5	4
4. Segu Bitòn	3	6	0	3	3	2	9

Bamakò tònba saba ka san mumè jate bò

Tònw	bòli hakè	se hakè	filanin bin	binni hakè	bi donnén	bitalen
Estad	42	23	9	10	72	41
Reyal	31	13	12	6	52	31
Jolibá	36	21	7	8	61	24



Estad balòn tannaw filè

Dakun filanan nana sugandi

Kalana "Sozemörku" kèra dakun filanan ntola ci kuluw la nana ye. U ye Bamakò galo filanan (Komini filanan) ci penaltı 4 ni 3, waati selen ka sòrò si ma se si la.

**Jèkabaara b'a nyini a kalanbagaw fè,
 n'u b'a fè ka faranfasiya sòrò fèn o fèn na,
 ani ni kibaruya min b'u fè u sigi yòròw farikolo nyèna jè ko la,
 u k'o kè sèbèn ye ka ci an ma,
 ka jaw ta ka ci an ma, n'a se b'u ye.**

tulon tè sebè sa

Furu ye jigi ye

Cèkòròba dò kèra, denmuso kelenpe de tun b'a fè, a ma den wèrè sòrò o denmuso kelen kò.

Denmuso nin furu tuma selen, cèw wulila a nò fè, fo ka se mògò saba ma. Cèkòròba ye nin cè saba bée ka wari minè a denmuso kelen nin tògò rò, k'a furu cè saba bée ma.

Den in selen na cèlataga ye, cèkòròba y'a furu min fòlò ma, o taara a nò fè, a y'a di o ma ko a ka taga ni a ye faasi, ko a ye den di o ma bi, a y'a d'a ma sini. Ko : "Nka i k'a minè konuman dè."

O ni dennen tagara ka san kelen kè. Don dò la, dennen ni a cè kélèla. Cè y'a minè ko a b'a gosi, o y'i kanto dennen ma ko : "Ni ne tè n miiri e fa la", ko "ne bè se ka e gosi ka e faga."

Dennen taara o kelen nyè fò a fa ye. Cèkòròba ye cè fòlò wele ka a ka wari di a ma ko ni ale sara ka a den to o bolo, ko ale denmuso ni o mana kélè, o tèna i miiri ale su la bilen, o na den faga.

A ye cè filanan wele k'a di o ma. A taara san kelen kè o fè yen. Don dò, a ni o kélèla. O fana ko ni ale t'i miiri a ba la, ko ale bè se k'a gosi fo k'a faga.

Dennen taara o kuma fò a fa ye, cèkòròba ye o fana wele ka o ka nafolo di o ma, ko ni dennen ba sara ka dennen to o bolo, ko o ni dennen mana kélè, o tèna i miiri dennen ba su la, o na ale den faga.

A ye cè sabanan wele k'a di

o ma. O ni dennen taara ka san kelen kè. Don dò la, dennen ni a cè sabanan kélèla. O fana ko "Ni ale t'i miiri furu ni a jujòn ko la", ko "n tèna e gosi bi, i n'a fò n k'i faga".

Dennen taara o kuma nyè fò a fa ye. Cèkòròba ko : "N denmuso, i cè ye nin ye koyi. Cè min ko ale b'i to i fa kosòn, i

fa tun mana sa, o tun tèna i miiri ne fa su la dè. Cè min fa na ko ale b'i miiri e ba la, e ba tun mana sa k'e to o bolo yen, o tun tèna i miiri e ba su la. Cè min ko ale b'e to furu kosòn, o ye i cè ye. Wa, ne ye e di o ma. Taga, i n'i cè ka kélè ban, e tè cè si sòrò dinyè na bilen min hakili ka bon ni e cè nin hakili ye", ko "furu ye jigi ye."

Kèfa Konare
Somabugu

Jèlan ka fisa nègèhaya ye

Kungo sogow farala nyögòn kan jara ka so k'u ka sanyèlèma filèli kè, ka san saraka nyini. U ye filèli kè, saraka taara bèn basa tulogerèn ma. Nka u yèrè bée b'a dòn ko n'u ye o tògò fò, basa bée boli.

U ye bèn kè basa kò fè ko u ka saraka ye sen naanima fèn kun bilen ye, ko saraka boli ye alamisa nata ye.

Alamisa selen, dugamasa kòrò panna, ka daaba bée wele. U bée ye nyögòn sòrò kòrò jara ka so.

Tuma min ni bée nana, jara ko : - "Ayiwa, a' ye sen naanima fèn kun bilen in minè."

Basa wulila kà boli ka taa.

Jama jènsènnèn kò fè, basa ni sonsan ye nyögòn ye.

Sonsan ko : - "E, dògò basa, a fòra ko sen naanima fèn kun bilen bée kè saraka ye, e dun bolila mun na ?"

A ko : - "E, n kòrò, ne boli len, a' ye jòni de k'a ye ?"

O ko : - "Mògò si."

- "Oo, ni ne tun ma boli dun ?"

- "Aa, an ka saraka tun bée bò."

- "Oo, n kòrò sonsan, e yèrè b'a dòn, jèlan ka fisa nègèhaya ye ; «nin tè fèn kè n dògò la», i dògò lankolon ka fisa o ye dè ; «ne donna, n ma fènta», i donbali ka fisa o ye dè."

Bakòròba Sise
Kalake bamanan

